

**MB: Debat 'Talkin untuk Umno Perlis' buang masa
Malaysiakini.com
January 24, 2011**

Pengerusi Badan Perhubungan Umno Perlis Datuk Seri Dr Md Isa Sabu hari ini mengajak ahli Umno negeri itu menumpukan kepada usaha memastikan kemenangan BN dalam pilihan raya umum akan datang.

Tindakan itu, kata beliau yang juga menteri besar Perlis, adalah jauh lebih berfaedah daripada berdebat mengenai isu 'Talkin untuk Umno Perlis'.

"Bagi saya debat itu hanya membuang masa dan rakyat Perlis sendiri akan meluat dengan isu perdebatan tersebut," katanya ketika ditemui pemberita selepas menyampaikan sumbangan sempena Tahun Baru Cina, di sini.

Beliau berkata demikian sebagai mengulas cabaran debat yang dilontar bekas Ketua Penerangan Umno negeri Datuk Hashim Suboh baru-baru ini.

Md Isa juga enggan mengulas lanjut mengenai isu tersebut.

'Talkin Untuk Umno Perlis' ditimbulkan oleh sekumpulan ahli Umno negeri itu yang dikatakan tidak berpuas hati dengan pemilihan Md Isa sebagai pengerusi badan perhubungan.

Talkin itu dikatakan sebagai amaran bahawa Umno Perlis kini dalam keadaan 'tenat'.

- Bernama